



NEGERI PULAU PINANG

PENYATA RASMI

**MESYUARAT PERTAMA
PENGKAL PERSIDANGAN KELIMA**

**DEWAN UNDANGAN NEGERI PULAU PINANG
YANG KETIGA BELAS**

**19 MEI 2017,
22 MEI 2017 HINGGA 25 MEI 2017**

19 MEI 2017 (JUMAAT)

Dikeluarkan oleh

**PEJABAT SETIAUSAHA KERAJAAN
BAHAGIAN DEWAN UNDANGAN NEGERI
PULAU PINANG**

PENYATA RASMI

MESYUARAT PERTAMA
PENGKAL PERSIDANGAN KELIMA

DEWAN UNDANGAN NEGERI PULAU PINANG
YANG KETIGA BELAS

19 MEI 2017 (JUMAAT)

Kandungan	Muka Surat
PENGUMUMAN OLEH YANG DI-PERTUA DEWAN UNDANGAN NEGERI	5
UCAPAN PERASMIAN OLEH T.Y.T. YANG DIPERTUA NEGERI PULAU PINANG	5
<i>Dewan ditangguhkan pada jam 1.10 tengah hari</i>	

LAPORAN PERSIDANGAN

MESYUARAT PERTAMA PENGAL PERSIDANGAN KELIMA

DEWAN UNDANGAN NEGERI PULAU PINANG YANG KETIGA BELAS

Tarikh : 19 MEI 2017(JUMAAT)
Masa : 9.30 Pagi
Tempat : Dewan Undangan Negeri
Lebuh Light, George Town
Pulau Pinang.

HADIR

Bil.	Nama	Ahli Kawasan
1.	Y.A.B. Lim Guan Eng	Ketua Menteri / Air Putih
2.	YB. Dato' Law Choo Kiang	Yang di-Pertua Dewan Undangan Negeri
3.	YB. Dato' Haji Mohd Rashid Bin Hasnon	Timbalan Ketua Menteri I/ Pantai Jerejak
4.	YB. Prof. Dr. P. Ramasamy A/L Palanisamy	Timbalan Ketua Menteri II/Perai
5.	YB. Chow Kon Yeow	Padang Kota
6.	YB. Dato' Haji Abdul Malik Bin Abul Kassim	Batu Maung
7.	YB. Chong Eng	Padang Lalang
8.	YB. Lim Hock Seng	Bagan Jermal
9.	YB. Law Heng Kiang	Batu Lancang
10.	YB. Phee Boon Poh	Sungai Puyu
11.	YB. Jagdeep Singh Deo A/L Karpal Singh	Datok Keramat
12.	YB. Dr. Afif Bin Bahardin	Seberang Jaya
13.	YB. Dato' Haji Maktar Bin Haji Shapee	Timbalan Yang di-Pertua Dewan Undangan Negeri/Sungai Bakap
14.	YB. Wong Hon Wai	Air Itam
15.	YB. Ong Kok Fook	Berapit
16.	YB. Dr. Hajah Norlela Binti Ariffin	Penanti
17.	YB. Dato' Haji Mohd. Salleh Bin Man	Permatang Pasir
18.	YB. Tanasekharan A/L Autherapady	Bagan Dalam
19.	YB. Yeoh Soon Hin	Paya Terubong
20.	YB. Teh Yee Cheu	Tanjong Bunga
21.	YB. Sanisvara Nethaji Rayer A/L Rajaji	Seri Delima
22.	YB. Ong Chin Wen	Bukit Tengah
23.	YB. Lau Keng Ee	Pengkalan Kota
24.	YB. Cheah Kah Peng	Kebun Bunga

Bil.	Nama	Ahli Kawasan
25.	YB. Lim Siew Khim	Sungai Pinang
26.	YB. Teh Lai Heng	KOMTAR
27.	YB. Yap Soo Huey	Pulau Tikus
28.	YB. Soon Lip Chee	Jawi
29.	YB. Lee Khai Loon	Machang Bubuk
30.	YB. Dr. T. Jayabalan A/L A. Thambyappa	Batu Uban
31.	YB. Dato' Hajah Jahara Binti Hamid	Telok Ayer Tawar
32.	YB. Datuk Sr. Haji Muhamad Farid Bin Haji Saad	Pulau Betong
33.	YB. Dato' Haji Roslan Bin Saidin	Pinang Tunggai
34.	YB. Dato' Haji Mahmud Bin Zakaria	Sungai Aceh
35.	YB. Datuk Haji Mohd Zain Bin Ahmad	Penaga
36.	YB. Dato' Haji Omar Bin Haji Abd Hamid	Permatang Berangan
37.	YB. Muhamad Yusoff Bin Mohd Noor	Sungai Dua
38.	YB. Nordin Bin Ahmad	Bayan Lepas
39.	YB. Datuk Shah Headan Bin Ayoob Hussain Shah	Telok Bahang
40.	YB. Haji Shariful Azhar Bin Othman	Bertam

AHLI-AHLI YANG HADIR MENGIKUT BAHAGIAN I BAB 3 PERKARA 6A PERLEMBAGAAN NEGERI PULAU PINANG.

HADIR

Bil.	Nama	Jawatan/Ahli Kawasan
1.	YB. Dato' Seri Haji Farizan Bin Darus	Setiausaha Kerajaan Negeri
2.	YB. Dato' Anas Bin Ahmad Zakie	Penasihat Undang-Undang Negeri
3.	YB. Puan Sarul Bahiyah Binti Haji Abu	Pegawai Kewangan Negeri

TURUT HADIR

Cik Maheswari A/P Malayandy - Setiausaha Dewan Undangan Negeri

Encik Mohd Roshidi Bin Azmi - Timbalan Setiausaha Dewan Undangan Negeri

Dewan mula bersidang pada jam 10.00 pagi.

Setiausaha Dewan:

Ahli-Ahli Yang Berhormat, Yang Berhormat Yang di-Pertua Dewan Undangan Negeri.

Ahli-Ahli Yang Berhormat, bacaan doa.

Ahli Kawasan Permatang Pasir (YB. Dato' Haji Mohd. Salleh bin Man):

Doa.

Setiausaha Dewan:

Pengumuman Yang Berhormat Yang di-Pertua Dewan Undangan Negeri.

Yang di-Pertua Dewan Undangan Negeri:

Ahli-Ahli Yang Berhormat, Tuan Yang Terutama Yang di-Pertua Negeri menetapkan hari ini 19 Mei 2017 sebagai hari permulaan Mesyuarat Pertama Penggal Kelima Dewan Undangan Negeri Ketiga Belas melalui pengisytiharan bertarikh 17 Mac 2017 yang telah diwartakan pada 30 Mac 2017. Dalam kesempatan ini saya bersama dengan semua Ahli-Ahli Dewan juga ingin merakamkan ucapan setinggi-tinggi tahniah kepada Tuan Yang Terutama Tun sempena Perlanjutan Perkhidmatan Tuan Yang Terutama sebagai Yang di-Pertua Negeri Pulau Pinang, juga setinggi-tinggi tahniah dan penghargaan diucapkan kepada Yang Amat Berbahagia Toh Puan.

Ahli-Ahli Yang Berhormat, Tuan Yang Terutama Tun dan Yang Amat Berbahagia Toh Puan akan tiba di Dewan sebentar lagi untuk menyampaikan ucapan kepada Dewan.

Setiausaha Dewan:

Ahli-Ahli Yang Berhormat, ketibaan Tuan Yang Terutama Yang di-Pertua Negeri dan Yang Amat Berbahagia Toh Puan. Ucapan oleh Tuan Yang Terutama Yang di-Pertua Negeri.

Tuan Yang Terutama Yang di-Pertua Negeri Pulau Pinang:

Assalamualaikum Warahmatullahi Wabarakatuh. Selamat pagi dan salam sejahtera.
Bismillahirrahmanirrahim.

Yang Berhormat Dato' Law Choo Kiang, Yang di-Pertua Dewan Undangan Negeri Pulau Pinang. Yang Amat Berhormat Tuan Lim Guan Eng, Ketua Menteri Pulau Pinang. Yang Berhormat Dato' Haji Mohd Rashid bin Hasnon, Timbalan Ketua Menteri 1 Pulau Pinang. Yang Berhormat Prof. Dr. P. Ramasamy a/l Palanisamy, Timbalan Ketua Menteri II Pulau Pinang. Yang Berhormat Dato' Seri Farizan bin Darus, Setiausaha Kerajaan Negeri Pulau Pinang. Yang Berhormat Dato' Hajah Jahara binti Hamid, Ketua Pembangkang. Yang Berhormat Ahli-Ahli Majlis Mesyuarat Kerajaan. Ahli-Ahli Dewan Undangan Negeri dan Ahli-Ahli Parlimen. Yang Berbahagia Dato'-Dato' dan Datin-Datin. Ketua-Ketua Jabatan Agensi Negeri dan Persekutuan. Tuan-tuan dan Puan-puan yang dihormati sekalian.

Alhamdulillah, setinggi-tinggi kesyukuran dipersembahkan ke hadrat Allah SWT kerana dengan izin dan limpah kurnia-Nya jua maka dapat kita berada dalam Dewan yang mulia ini bagi Majlis Perasmian Mesyuarat Pertama Penggal Kelima Dewan Undangan Negeri Yang Ketiga Belas. Pada kesempatan ini, saya ingin mengucapkan tahniah kepada Ahli-Ahli Yang Berhormat yang berusaha gigih menjaga kebajikan rakyat di kawasan masing-masing.

KEKUKUHAN EKONOMI.

Ahli-Ahli yang Berhormat. Jika diamati, sepanjang tahun 2016 Kerajaan Negeri di bawah kepimpinan baik oleh Yang Amat Berhormat Ketua Menteri dan barisan Ahli-Ahli EXCOnya telah menguruskan kewangan dan pentadbiran negeri dengan berkesan. Kedudukan kewangan terus mantap manakala penjana sumber pendapatan Negeri telah dipelbagaikan. Saya dimaklumkan bahawa *Exit Conference* bagi Penyata Kewangan Negeri Tahun 2016 oleh Ketua Audit Negara menunjukkan pengurusan kewangan Negeri adalah amat memberangsangkan. Saya turut berbangga apabila Pulau Pinang selama sembilan tahun berturut-turut terus mendahului negeri-negeri lain dalam mengemukakan Penyata Kewangan Negeri paling awal.

PERKEMBANGAN EKONOMI DAN PELABURAN.

Ahli-Ahli Yang Berhormat. Dalam usaha untuk menjadikan Pulau Pinang sebagai sebuah negeri yang bertaraf antarabangsa dan pintar, Kerajaan Negeri perlu menjayakan transformasi ke arah negeri keusahawanan dan kebajikan, di mana semua rakyat diberikan peluang yang sama untuk mengecap kemajuan ekonomi serta hasil kemakmuran juga dapat dinikmati oleh semua tanpa kira agama dan kaum. Transformasi ini menampakkan hasil apabila pertumbuhan per kapita yakni GDP telah membangun daripada kedudukan tercorot di bawah di antara semua negeri-negeri di Malaysia dalam tempoh 2005 hingga 2015 kepada yang paling baik mulai 2013 hingga 2015.

Pulau Pinang adalah satu-satunya negeri industri di Malaysia dengan sektor pembuatan menyumbang 45% dan sektor perkhidmatan menyumbang kepada 50% kepada GDP negeri. Jumlah pelaburan mencatat peningkatan sebanyak 73% iaitu peningkatan daripada RM34.2 bilion pada tahun 1999 hingga 2007 kepada RM59.2 bilion untuk tempoh 9 tahun yang sama pada tahun 2008 hingga 2016. Peluang pekerjaan yang baru juga naik 15% daripada 121,511 pekerjaan baru untuk tempoh tahun 1999 hingga 2007 kepada 139,133 pekerjaan baru untuk tempoh 2008 hingga 2016. Kerajaan Negeri akan terus bekerjasama dengan agensi Kerajaan yang terlibat untuk menarik lebih banyak pelaburan.

Pulau Pinang mencatat pertumbuhan ekonomi sebanyak 5.5% berbanding dengan pertumbuhan GDP negara sebanyak 5% pada tahun 2015. Cabarannya ialah untuk memastikan hasil kemakmuran ini dapat dikecapi oleh semua. Justeru, menerusi konsep negeri berkeadilan, Kerajaan Negeri telah membuat pelaburan dalam penaiktarafan infrastruktur asas seperti jalan, bekalan air dan longkang serta membina kemudahan awam seperti perumahan awam, taman lapang hijau, kompleks sukan dan dewan orang ramai. Tumpuan diberikan kepada kawasan Seberang Perai, di mana 70% daripada peruntukan pembangunan negeri, Perbadanan Pembangunan Negeri Pulau Pinang (PDC) dan Perbadanan Bekalan Air Pulau Pinang (PBAPP) dibelanjakan demi mencapai pembangunan seimbang dan mampan di antara kawasan Pulau dan Seberang Perai.

Pada Tahun 2016, Pulau Pinang telah mencatatkan jumlah pelaburan sebanyak RM4.3 bilion dengan 106 projek diluluskan. Daripada jumlah tersebut, sebanyak RM3.1 bilion adalah daripada pelaburan asing manakala RM1.2 bilion daripada pelaburan domestik.

Pelaburan dalam industri berat sememangnya memberi impak yang tinggi kepada negeri, namun Pulau Pinang tidak mengabaikan Industri Kecil dan Sederhana yakni IKS yang dilihat semakin rancak berkembang dan menjadi pendokong kepada sektor-sektor lain. Saya difahamkan pada 8 Februari lalu, Kluster Automasi Pulau Pinang (*Penang Automation Cluster*) bernilai RM63 juta telah ditubuhkan di perkampungan IKS seluas 150 ekar oleh tiga (3) syarikat besar tempatan yang akan membantu serta bekerjasama dengan 18 buah syarikat IKS yang lain. Kluster Automasi Pulau Pinang ini juga akan menjadi hub bagi '*precision metal fabrication*' bertaraf dunia yang mengintegrasikan syarikat besar tempatan dengan syarikat IKS.

PEMBANGUNAN SEKTOR PELANCONGAN DAN WARISAN NEGERI.

Ahli-ahli Yang Berhormat,

Dalam sektor pelancongan, Lapangan Terbang Antarabangsa Pulau Pinang telah melebihi kapasiti penumpang sebanyak 6.5 juta dengan mengendalikan 6.7 juta penumpang dalam 2016, iaitu empat (4) tahun lebih awal daripada anggaran 2020. Prestasi Pulau Pinang sebagai destinasi pelancongan dengan Tapak Warisan Dunia UNESCO George Town dan juga hospital-hospital berkualiti mendapat perhatian seluruh dunia. Saluran Berita Televisyen CNN meletakkan Pulau Pinang di tempat kedua daripada 17 tempat paling menarik yang mesti dilawati di dunia pada tahun 2017. Manakala laman web kesihatan *International Living* telah mengiktiraf Pulau Pinang sebagai "*No. 1 Best Healthcare In The World*". Baru-baru ini, penganjuran *Penang International Food Festival* atau PIFF yang pertama di Pulau Pinang untuk meraikan makanan Pulau Pinang, khususnya makanan jalanan ataupun *street food* yang paling sedap di dunia, telah menarik lebih daripada 400,000 pengunjung.

Pelayaran *cruise* juga mendapat tempat di hati pelancong di mana saya difahamkan seramai 1.2 juta penumpang telah direkod menggunakan Pelabuhan Swettenham bagi tahun 2016. Saya berasa bangga apabila sepanjang tahun 2016 dan awal tahun 2017, Pulau Pinang telah disenaraikan dalam pelbagai penerbitan dan artikel antarabangsa sebagai destinasi pelancongan yang terunggul di dunia merangkumi pelbagai produk dari makan jalanan (*street food*) hingga ke pelancongan perubatan (*medical tourism*).

Selain itu, Kerajaan Negeri berhasrat untuk menjadikan Pulau Pinang sebagai bandaraya perubatan. Dalam usaha mempromosi pelancongan perubatan di Pulau Pinang, saya memuji inisiatif Kerajaan Negeri menubuhkan *Penang Center of Medical Tourism* ataupun PMED dengan penglibatan 10 buah hospital swasta di Pulau Pinang. Hasil kerjasama yang dijalinkan, saya difahamkan Pulau Pinang telah berjaya merekodkan peningkatan jumlah pelancong perubatan sebanyak 14.77% iaitu dari 302,000 orang pada tahun 2015 kepada 347,000 orang pada tahun 2016.

Hasil pendapatan juga meningkat sebanyak 17.92% daripada RM391 juta pada tahun 2015 kepada RM458 juta pada tahun 2016. Ini adalah suatu peningkatan yang cukup membanggakan. Keyakinan sektor swasta memang terserlah apabila Island Hospital Medical sedia melabur RM2 bilion di Pulau Pinang untuk menambah 300 buah katil yang sedia ada kepada 1,000 buah katil yang menjadikannya sebagai hospital swasta yang paling besar di Malaysia.

Pengiktirafan *Malaysia Book of Record* yang diterima oleh Bukit Bendera bagi Funikular Tunggal di Malaysia dan Trek Funikular terpanjang di Asia juga merupakan kejayaan besar dalam sektor pelancongan Negeri. Pada tahun 2016, jumlah pengunjung Bukit Bendera adalah seramai 1.6 juta orang, berbanding 1.57 juta orang pada tahun 2015. Dalam hal ini, cadangan pewartaan Bukit Bendera sebagai “*Unesco Biosphere Reserve*” adalah bertepatan dengan usaha untuk memulihara kawasan Bukit Bendera sebagai satu daripada warisan utama Pulau Pinang.

Mengenai warisan, suka saya nyatakan bahawa langkah Kerajaan Negeri yang berusaha menjaga nilai-nilai keunggulan sejagat George Town sebagai Tapak Warisan Dunia patut disokong. Saya difahamkan kajian serta pengemaskinian maklumat berkenaan 2,557 bangunan, 1,637 premis di kawasan penampakan tapak warisan dan proses membaikpulih 220 set pelan bangunan lama berjalan lancar.

Satu penemuan arkeologi penting disaksikan di Guar Kepah, Kepala Batas, Seberang Perai Utara (SPU) apabila rangka wanita purba berusia 5,710 tahun dahulu yang hidup semasa zaman Neolitik telah ditemui. Rangka manusia purba yang digelar sebagai *Penang Woman* ini akan ditempatkan di Pusat Arkeologi bertaraf antarabangsa yang akan dibina oleh Kerajaan Negeri di atas tapak seluas dua (2) ekar. Kerajaan Negeri juga akan berusaha untuk mendapatkan status *UNESCO World Heritage* untuk tapak arkeologi Guar Kepah ini.

PERKEMBANGAN SEKTOR PERTANIAN DAN ASAS TANI

Ahli-Ahli Yang Berhormat,

Sungguhpun Kerajaan Negeri memberi tumpuan kepada sektor perindustrian dan perkhidmatan, sektor pertanian masih kekal relevan dan penting dalam menyumbang kepada kepesatan ekonomi negeri. Saya dimaklumkan, bagi pengeluaran ladang, Nilai Hasil Ternakan (NHT) sejak tahun 2014 terus mengekalkan perolehan melebihi Lapan Ratus Juta Ringgit (**RM800 juta**) setiap tahun. Pengeluaran NHT telah meningkat daripada Lapan Ratus Dua Puluh Tujuh Perpuluhan Sembilan Enam Juta Ringgit (RM827.96 juta) pada tahun 2015 kepada Lapan Ratus Empat Puluh Dua Perpuluhan Lima Lima Juta Ringgit (**RM842.55 juta**) pada tahun 2016 iaitu peningkatan sebanyak Empat Belas Perpuluhan Lima Sembilan Juta Ringgit (**RM14.59 juta**) bersamaan 1.8 peratus. Kadar ini dijangka akan terus berkembang dan dianggarkan akan melebihi Lapan Ratus Lima Puluh Juta Ringgit (**RM850 juta**) pada tahun 2018.

Promosi Industri Asas Tani (IAT) juga terus diberi perhatian bagi memperkasakan Pulau Pinang sebagai sebuah Negeri keusahawanan. Pada tahun 2016, sudut *creativity index* bagi promosi IAT adalah satu nisbah tiga (1:3), di mana setiap RM1 yang telah dibelanjakan oleh Kerajaan Negeri telah memberi pulangan sebanyak RM3 kepada usahawan Pulau Pinang. Untuk itu, saya menyambut baik inisiatif Kerajaan Negeri untuk menganjurkan sekurang-kurangnya empat (4) Karnival Asas Tani di luar Negeri

Pulau Pinang serta menyertai program-program promosi usahawan di negeri-negeri lain.

Tabung Usahawan Tani Muda yang dilaksanakan bagi menggalakkan anak muda menyertai industri pertanian semakin mendapat tempat. Sehingga ini, seramai 66 orang peserta telah menyertai program berkenaan sejak tiga tahun pelaksanaannya. Kerajaan Negeri telah membelanjakan sebanyak Ringgit Malaysia Tujuh Ratus Lima Puluh Ribu Ringgit **(RM750,000.00)** bagi tujuan pinjaman mikro kredit tanpa faedah ini. Saya berharap lebih ramai usahawan tani muda akan mengambil peluang untuk menyertai program ini.

Kerajaan Negeri tidak meminggirkan golongan nelayan di mana bantuan kepada golongan ini juga diberi tumpuan oleh Kerajaan Negeri. Di samping menyediakan tukun-tukun tiruan baharu sebagai kawasan pembiakan ikan, para nelayan juga diberi bantuan pukot sejak 2013. Bantuan pukot yang dimulakan sejak 2013 telah berjaya membantu seramai 3,186 nelayan negeri Pulau Pinang. Bantuan bagi tahun 2017 akan terus dilakukan dan dijangka dilaksanakan pada awal Jun 2017 dengan melibatkan seramai 1,664 nelayan dengan anggaran kos Ringgit Malaysia Tiga Ratus Dua Puluh Sembilan Ribu **(RM329,000.000)**.

PENGURUSAN ALAM SEKITAR DAN SISA PEPEJAL

Ahli-Ahli Yang Berhormat,

Dalam usaha mentransformasikan Pulau Pinang kepada Negeri usahawan dan kebajikan, pemeliharaan dan perlindungan alam sekitar tidak dilupakan. Pulau Pinang boleh berbangga kerana merupakan satu-satunya Negeri di Malaysia yang tidak menaruh atau menyentuh seinci persegi pun hutan simpan kekalnya sejak tahun 2006. Itulah salah satu sebab utama mengapa Pulau Pinang berjaya memastikan bekalan air yang mencukupi. Kejayaan menjadi satu-satunya Negeri yang tidak pernah menjalankan catuan air ialah kerana kawasan tadahan air diwartakan dan hutan simpan kekal dijaga sehingga empangan air di Pulau Pinang adalah penuh.

Saya juga ingin mengucapkan tahniah kepada Kerajaan Negeri di atas usaha untuk membina stesen pemindahan sampah bernilai Enam Puluh Satu Perpuuluh Lima Juta Ringgit **(RM61.5)** di Batu Maung. Saya difahamkan stesen ini berupaya menerima sehingga 800 tan sampah sehari bila mula beroperasi pada 1 April 2018. Dengan adanya stesen ini, semua sampah Bahagian Pulau akan disalurkan ke stesen ini untuk dimampat dan diangkut ke tapak pelupusan sampah di Pulau Burung, Seberang Perai Selatan untuk dilupuskan. Dengan usaha ini, ianya akan meningkatkan lagi tahap kebersihan dan menghijaukan alam sekitar.

Pulau Pinang juga merupakan Negeri yang terkehadapan dalam pengasingan sisa iaitu usaha untuk mengurangkan jumlah sampah yang dijana. Walau bagaimanapun, penduduk diberi tempoh satu tahun sejak dilancarkan pada 1 Jun 2016 untuk bersiap sedia dalam pelaksanaan dasar ini, namun ramai yang telah mengamalkan cara hidup moden ini. Mulai 1 Jun 2017, Kerajaan Negeri melalui Pihak Berkuasa Tempatan (PBT) akan menguatkuasakan dasar ini di seluruh Negeri dan denda akan dikenakan bagi mana-mana premis yang melanggar undang-undang kecil ini. Pulau Pinang juga merupakan Negeri yang memiliki kadar kitar semula yang paling tinggi iaitu sebanyak 38% berbanding

dengan purata kebangsaan sebanyak 20.9% pada 2016.

PENYEDIAAN PERUMAHAN UNTUK RAKYAT

Ahli-Ahli Yang Berhormat,

Saya percaya sasaran Kerajaan Negeri untuk menyediakan sebanyak 26,255 unit Rumah Mampu Milik dengan pihak swasta pelbagai kategori untuk rakyat Pulau Pinang menjelang tahun 2022 akan tercapai. Sejak 2008-2016, Kerajaan Negeri telah membina 20,887 unit rumah kos rendah dan sederhana rendah berbanding dengan 5,124 unit pada tempoh 2000-2007. Dalam memastikan kesejahteraan dan kelangsungan hidup rakyat terus menjadi keutamaan, Kerajaan Negeri pada tahun 2017 telah memperuntukkan sebanyak Sembilan Perpuuluh Enam Sembilan Juta Ringgit (**RM9.69 juta**) di bawah Bajet Pembangunan untuk kerja-kerja menaiktaraf dan menyenggara 50 skim Rancangan Perumahan Awam melibatkan sebanyak 15,490 unit rumah dan kedai. Ini termasuklah kerja-kerja pembaikan keretakan di Rancangan Perumahan Mak Mandin, Rancangan Perumahan Padang Tembak dan Rancangan Perumahan Teluk Bahang yang melibatkan peruntukan pembangunan sebanyak Dua Perpuuluh Lima Tiga Juta Ringgit (**RM2.53 juta**).

NEGERI KEBAJIKAN

Ahli-Ahli Yang Berhormat,

Satu aspek Negeri kebajikan ialah Agenda Ekonomi Saksama (AES) dan Program i-Sejahtera di mana bantuan kewangan secara wang tunai sebanyak **RM412.63** juta diberikan kepada 1.6 juta rakyat Pulau Pinang sejak tahun 2008. Ia merangkumi Warga Emas, bayi, OKU, Ibu Tunggal, Ibu yang tidak bekerja, pelajar, pemandu teksi, operator bas sekolah berdaftar, penarik beca, bantuan pukut kepada nelayan dan **RM1,000** kepada mahasiswa-mahasiswi tempatan. AES merupakan pelaksanaan *universal basic income* (pendapatan asas sejagat) pertama di Malaysia di mana Kerajaan Negeri menghapuskan miskin tegar dengan menjamin setiap keluarga menerima **RM790** sebulan. Bagi keluarga yang menerima pendapatan yang kurang daripada **RM790** sebulan, Kerajaan Negeri akan menambahnya sehingga cukup **RM790** setiap bulan. Lebih **RM23.2** juta telah dibelanjakan untuk program AES ini sejak ia dimulai pada tahun 2014. Kejayaan AES jelas dilihat dengan kejayaan Kerajaan Negeri mengurangkan ketidaksamaan pendapatan daripada 0.419 pada 2009 kepada 0.364 pada tahun 2014 iaitu penurunan sebanyak 13 % dalam enam (6) tahun. Kerajaan Negeri prihatin dengan bebanan kewangan yang ditanggung oleh rakyat yang berpendapatan rendah dalam keadaan ekonomi yang merosot dan inflasi yang tinggi yang naik sehingga 5.1% pada bulan Mac dan 4.4% pada bulan April. Kerajaan Negeri memberikan potongan cukai pintu sebanyak 6% dan pengecualian cukai pintu penuh bagi rumah kos rendah, rumah kos sederhana rendah dan rumah kampung / bertanah pada tahun 2017. Dengan menambah penyerapan bayaran GST oleh Kerajaan Tempatan, ini bermakna kedua-dua Majlis Bandaraya Pulau Pinang dan Majlis Perbandaran Seberang Perai akan menanggung **RM55** juta untuk memanfaatkan rakyat.

Dalam membantu rakyat yang berpendapatan rendah juga, Projek Khas Ekonomi yang merupakan dan memperuntukkan sejumlah Dua Perpuhuan Kosong Tiga Satu Juta Ringgit (**RM2.031** juta) pada tahun 2016 bagi projek pembinaan baru ini dan baik pulih rumah. Bagi membantu peniaga yang masih berada di tahap permulaan dengan pendapatan bulan kurang daripada **RM3,000.00** sebulan, bantuan peralatan diberikan untuk membantu peniaga membeli perkakasan bagi meningkatkan hasil jualan.

PEMBANGUNAN WANITA DAN KANAK-KANAK

Ahli-Ahli Yang Berhormat,

Pulau Pinang telah mencapai kecemerlangan dalam mengambil langkah-langkah proaktif untuk penglibatan wanita dalam kepimpinan pentadbiran awam. Sebagai contoh, Majlis Bandaraya Pulau Pinang (MBPP) telah mencapai 33% penglibatan wanita sebagai Ahli Majlis setanding dengan pencapaian negara-negara maju.

Kerajaan Negeri juga sedar akan pentingnya kewujudan sistem penjagaan kanak-kanak yang selamat dan komprehensif untuk ibu bapa yang bekerja terutamanya dalam meningkatkan penglibatan kaum ibu dalam tenaga kerja. Usaha sedang diambil untuk mendaftarkan semua Taska dan Pusat Jagaan Kanak-Kanak di Pulau Pinang yang masih belum berdaftar dengan Jabatan Kebajikan Masyarakat.

HAL EHWAL AGAMA ISLAM

Ahli-Ahli Yang Berhormat,

Ketetapan bahawa Islam adalah agama rasmi perlu dihormati oleh semua. Islam adalah agama yang berlandaskan ilmu dan untuk itu Islam mewajibkan umatnya menuntut ilmu dengan memberikan keseimbangan antara ilmu agama bagi memenuhi tuntutan fardhu ain dengan tuntutan ilmu duniawi bagi memenuhi fardhu kifayah sebagaimana yang disebutkan oleh Imam Al-Ghazali.

Saya bersyukur, urusan hal ehwal agama Islam diberi perhatian berat oleh Kerajaan Negeri. Pembinaan institusi pendidikan Islam melalui pembinaan Sekolah Agama Rakyat terus diberi keutamaan. Antaranya, saya dimaklumkan pembinaan Sekolah Agama Rakyat Guar Jering telah siap dibina pada tahun 2016. Sementara itu, Sekolah Agama Rakyat Masjid Daerah Seberang Perai Selatan, Sekolah Agama Rakyat Tuan Guru di Tanjong Tokong dan Sekolah Agama Rakyat di Masjid Abdullah Fahim sedang dalam proses untuk dibina. Semua sekolah agama termasuk Maahad Tahfiz di Negeri ini akan didaftarkan sebagai dan juga untuk membolehkan penyaluran bantuan dan pemantauan dijalankan supaya mutu pembelajaran dan kebajikan pelajar terbelas.

Pembangunan Islam di Pulau Pinang yang mendokong kedudukannya sebagai Agama Persekutuan dan tidak diabaikan apabila jumlah peruntukan untuk Hal Ehwal Agama Islam naik 84% pada tahun 2008 kepada **RM457** juta untuk tempoh 2008 hingga 2016 berbanding dengan **RM257** juta untuk tempoh 2000 hingga 2007. Dan, siapnya Kompleks Kehakiman dan Mahkamah Tinggi Syariah Pulau Pinang di Jalan Scotland, atas tanah Kerajaan Negeri yang bernilai **RM80** juta dan perbelanjaan

kos pembinaan **RM33** juta oleh Kerajaan Persekutuan, merupakan satu lagi kejayaan dalam pembangunan Islam.

Semua ini tidak mungkin tercapai tanpa pentadbiran Cekap, Akauntabiliti dan Telus iaitu (CAT) dan kepimpinan bersih yang diterapkan ke dalam tata kelola Kerajaan Negeri. Urus tadbir CAT membuahkan kejayaan Pulau Pinang yang berjaya mencatat bajet lebihan sebanyak **RM573** juta bagi tempoh 8 tahun dari 2008 hingga tahun 2015. Ini berbanding dengan lebihan bajet terkumpul bagi tempoh 1957 hingga tahun 2007 sebanyak **RM373** juta untuk 50 tahun. Nilai aset Negeri Pulau Pinang pula meningkat hampir sekali ganda dalam tempoh 8 tahun, iaitu sebanyak **RM850** juta kepada **RM1.6** bilion.

MODAL INSAN

Ahli-Ahli Yang Berhormat,

Saya memuji Kerajaan Negeri yang meneruskan usaha membina infrastruktur asas dan modal insan demi menjamin pembangunan ekonomi yang mampan. Sektor pembuatan berada di ambang revolusi Industri 4.0 yang membabitkan *Big Data Analytis, Cloud Computing, E-Commerce, Crowd Sourcing* dan *Internet of things*. Demi menyertai Industri 4.0, adalah perlu kita membangunkan modal insan yang mencukupi. Tumpuan diberikan dalam Pendidikan STEM iaitu (*Science, Technology, Engineering* dan *Maths*) demi memastikan Pulau Pinang menjadi pusat e-kecemerlangan sains dan teknologi.

PERKHIDMATAN AWAM

Ahli-Ahli Yang Berhormat,

Saya mengambil kesempatan ini mengucapkan syabas kepada penjawat awam yang bertungkus lumus memajukan Pulau Pinang. Suka saya menasihatkan para penjawat awam agar sentiasa mempertahankan nama baik perkhidmatan, dengan teguh, dengan perinsip menolak rasuah serta tegas menentang perbuatan salah guna kuasa yang boleh mengakibatkan berlakunya ketirisan hasil negeri. Contohnya: “Nabi Allah Sulaiman *Alaihissalam* yang tidak tergugat dengan sogokan kebendaan sebagai inspirasi dalam melaksanakan tugas. Baginda dan secara tegas, Baginda telah menolak hadiah yang dipersembahkan oleh Raja Perempuan Negeri Saba; seperti yang diriwayatkan didalam satu ayat 36 Surat An-Naml yang bermaksud:

“Maka apabila yakni (utusan pembawa hadiah itu) datang menghadap Nabi Sulaiman, berkatalah Nabi Sulaiman: Tidaklah patut kami memberikan hadiah kepadaku pemberian harta benda, apa yang Allah berikan kepadaku lebih baik dari apa yang diberikanNya kepada kamu.”

Saya menyokong penuh usaha Kerajaan Negeri memerangi rasuah dalam kalangan penjawat awam dengan mengambil tindakan tegas termasuk pembuangan kerja bagi mereka yang didapati bersalah melakukan rasuah. Malah saya mengharapkan penjawat awam yang lebih berani untuk melaporkan usaha pihak-pihak yang tidak bertanggungjawab untuk merasuah penjawat awam di Pulau Pinang.

Alhamdulillah, beberapa agensi Kerajaan Negeri telah mendapat pengiktirafan hasil daripada daya usaha para penjawat awam. Untuk itu, saya merakamkan ucapan tahniah kepada Pejabat Setiausaha Kerajaan Negeri Pulau Pinang (PSUKPP) di atas kejayaan mengekalkan Persijilan Semula MS ISO 9001:2008 untuk tahun ke-5 berturut-turut, pengiktirafan Bintang Petunjuk Prestasi Utama (KPI) HRMIS dan Persijilan Berkualiti 5S.

Tahniah juga diucapkan kepada PSUKPP, Jabatan Kewangan Negeri, Perbadanan Pembangunan Pulau Pinang (PDC), Jabatan Hal Ehwal Agama Islam Negeri Pulau Pinang, Majlis Agama Islam Negeri Pulau Pinang, Majlis Sukan Negeri, Pejabat Daerah dan Tanah Seberang Perai Tengah dan Pejabat Daerah dan Tanah Seberang Perai Utara di atas Anugerah Lima Bintang dalam Pengurusan Kewangan yang Berdasarkan Akauntabiliti. Syabas juga kepada Majlis Bandaraya Pulau Pinang (MBPP) dan Majlis Perbandaran Seberang Perai (MPSP) atas pengiktirafan antarabangsa.

Sebagai penutup, Ahli-Ahli Yang Berhormat. Membangun dan memakmurkan sesebuah negeri adalah suatu usaha yang mencabar dan merupakan amanah yang sangat berat untuk dipikul. Namun, pekerjaan yang berat ini menjadi ringan apabila dibuat secara bersama dengan semangat berpasukan yang tinggi dalam kalangan kepimpinan negeri dan dokongan rakyat. Semangat kental rakyat Pulau Pinang membolehkan Kerajaan Negeri meningkatkan lagi imej lepas kepada Pulau Pinang yang terus dengan bersih, hijau dan sihat serta selamat.

Untuk itu, saya sekali lagi mengucapkan terima kasih kepada Yang Amat Berhormat Ketua Menteri dan Ahli-Ahli Majlis Mesyuarat Kerajaan Negeri atas kecemerlangan khidmat bakti yang dicurahkan dalam kepimpinan Negeri ini. Yang Amat Berhormat Ketua Menteri sentiasa berusaha menjaga rakyat tanpa mengira kaum, agama dan latar belakang demi menyatupadukan rakyat.

Saya juga merakamkan setinggi-tinggi penghargaan dan terima kasih kepada seluruh Anggota Perkhidmatan Awam, pasukan keselamatan khususnya pasukan Polis Diraja Malaysia dan Angkatan Tentera Malaysia serta semua pihak yang terlibat dalam menyumbang ke arah pembangunan, keamanan dan kemakmuran Negeri serta kesejahteraan rakyat.

Akhir kata, semoga Allah SWT sentiasa melimpahkan kurnia dan rahmatNya kepada kita semua dan melindungi Negeri yang tercinta ini agar kita terus maju dan makmur serta rakyatnya mendapat taufik dan hidayah, sejahteran, bersatu padu serta sentiasa hidup dalam keadaan aman, damai sentosa di bawah lindunganNya.

Dengan lafaz *Bismillah*hirahmanirrahim, saya dengan sukacitanya merasmikan pembukaan Mesyuarat Pertama Penggal Kelima Dewan Undangan Negeri Pulau Pinang Yang Ketiga Belas. Sekian terima kasih. *Wassalamualaikum Warahmatullahi Wabarakatuh*.

YB. Yang di-Pertua Dewan Undangan Negeri:

Ahli-Ahli Yang Berhormat,

Para hadirin sekalian, Tuan Yang Terutama Tun dan Yang Amat Berbahagia Toh Puan akan meninggalkan Dewan ini sebentar lagi. Ahli-Ahli Yang Berhormat dijemput untuk bergambar bersama-sama dengan Tuan Yang Terutama Tun dan Ahli-Ahli Yang Berhormat, Mesyuarat ditangguhkan dan Dewan akan bersidang semula pada hari Isnin 22 Mei 2017, Jam 9.30 pagi.

Setiausaha Dewan:

Tuan Yang Terutama Yang di-Pertua Negeri dan Yang Amat Berbahagia Toh Puan meninggalkan Dewan Persidangan.

Dewan ditangguhkan pada jam 11.00 pagi.